

Gou Maij Seizcou

我喜欢秋天

Seizcou, byaij youq ndaw reihnaz, nyouq daengz meg rang mak hom, byaij youq ndaw ndoengfaex, yawjraen mbaw henj mbaw hoengz, byaij youq ndaw rumz iq, roxnyinh sim soeng vaiqvued……Seizcou ndei baenzneix, vunz baenz-lawz mbouj maij de ne?

Gou maij ronghndwen seizcou. Ronghndwen seizcin najnyaenq, lumj boux lwgnding nei, lienr rongh de cungj mbouj rongh geijlai; aen ronghndwen seizhah ronghsagsag, dawz aen congheueg cien gya fanh hoh ciuq ndaej haucan; ronghndwen seizdoeng nitgoet, lumj boux dahsau dasang ndeu, fanhfaed youq laj ronghndwen seizdoeng cungj yienh ndaej nityatyat, mbouj miz senggei; cij miz ronghndwen seizcou hozswnh, ndwn youq laj mbwnhaemh, ngiengx gyaeuj yawj ronghndwen, cungj siengj aeu de dangguh baengzyoux gyausim, dawz vah ndawsim gangj hawj de nyi.

Gou maij gij reihnaz seizcou. Din dieb youq gwnz namh ndaem biz haenx, mwngz roxnyinh daengz vunzloih gohgi caiq baenzlawz fatdad, gij goekrag neix, itcig dwg gvihaeuj daswyenz. Bungj

gaem haeuxgok henjgim ndeu hwnjdaeuj nyouq, mwngz couh rox, cijmiz seizcin、seizhah sinhoj lae hanh, cij vuenh ndaej daeuj gij henjrwgrwg neix.

Gou maij mbawloenq seizcou. Bungj bonjsaw, daeujdaengz laj go faex ndeu, baeg le, mbouj haeusim baez ngiengx gyaeuj, gij mbaw henj haenx sawqmwh mbin daengz ndaw saw daeuj, sijsaeq yawj gij mbawloenq haenx, couh lumj yawjraen ciuhvunz de: Youq ndaw rumzcin, de daenj geu buh heu he, iet gyaeuj okdaeuj, gamjsouh nditndat raeujrub、fwncin diemzsub、rumz iq cife; seizhah, nditndat lumj feiz, deng ndat ndaej ajngaeb heiqaek, hoeng lij roengzrengz ndwn soh, cij siengj lai soengq faenh yaemliengz ndeu hawj gyoengqvunz; seizcou mbwn gvengqlili, dienheiq liengzsangj, mwh gyoengqvunz bouxboux gwnz naj loh gij angq ndaej fungsou, de guhbaenz le sawjmingh daj gwnz gofaex mbin roengzdaeuj. Hoeng de mbouj gamsim, roxnyinh swheij wnggai caiq guh di saehndei、saeh miz eiqsei haenx, yienghneix, de mbin daengz ndaw saw bae, guh le mbaw ciemsaw ndeu, hawj sengmingh ndaej daengz ciengxlwenx gyaenanz!




Youq laj ronghndwen gangj vah ndawsim, youq ndaw naz soundaej hoizbauq, youq laj gofaex cinghseuq aensim……

Gou maij seizcou!

(Yinznanz Swngj Gunhmingz Si Anhningz Si Sizyen Yozyau haj nienzgaep seiq ban Yangz Cinghyaj sij, Veiz Yennaz hoiz)

Youh Daengz Mwh Ndaemnaz

又到一年
插秧时



Gwnz loh cuengqhag ma ranz, gizzig cungj dwg sing “dududu” “gunggung”, laxlawz dwg gih-rauqnaz nyaengq dwk rauqnaz, gihndaemnaz nyaengq dwk ndaemnaz ne!

Ma daengz ranz, gou couh rag fwngz daxbuz guh’ unj naeuz: “Buz, cozyez gou youq hagdangz gaenq sij sat lo, gou caeuq mwngz caez bae ndaemnaz, ndei lwi?” Daxbuz euq mbouj gvaq gou, cijndei dapwngq gou lo. Gou riengz laeng daxbuz saetsaet yatyat bae ndaw naz lo.

Daxbuz nyoengx ci iq, dawz gyaj baenz gienj baenz gienj soengq daengz henz naz, bouxndaemnaz caiq dawz go gyaj heuyayau haenx, siujsim baij youq gwnz gihndaemnaz. “gunggung” gihndaemnaz hainduj ndaemnaz lo, bouxndaemnaz yat hwnj gwnz gihndaemnaz bae, gihndaemnaz soengset hai bae naj, baihlaeng louz roengz baenz baiz baenz baiz gyaj caezcaez cingjing, couh lumj swbingh lieddoih ndwn youq gyang naz nei. Gou ndwn youq gyaeuj naz geizheih yawj dwk, ha, aen gihndaemnaz neix saenzgeiz lai lo! De gingqyienz ndaej vaiqvuet youh caezcingj aeu gyaj

ndaem roengz naz bae, caen ak lai bw! Daxbuz hix youq henz nam naeuz: Lij dwg gihgi yendaiva ndaemnaz ndei ha! Gou cam daxbuz: “Mwngz gag gangj gag naeuz gijmaz ha?” Daxbuz naeuz: “Gaxgonq cungj dwg aeu vunz baenz go baenz go gyaj ndaem roengz naz bae, couhcinj daj haet nyaengq daengz haemh, baeg ndaej ndang naiq hwet in, hix cij ndaem ndaej gaiq naz ndeu. Seizneix ndei lo, youh vaiq youh mbaet rengz.” Gou itmienh dingq daxbuz gangj gij saeh gaxgonq, itmienh naemj gij vah daxbuz gangj haenx, ndawsim roengz gietsim: Gou itdingh ndeindei doegsaw, fatmingz engqlai gihgi yendaiva, hawj boh- lungz nungzminz guh nazreih engq soengset.

Mbouj yaep ndeu, gaiq naz ndeu couh ndaem sat lo. Yawj gvaqbae, go gyaj heuyayau lienr baenz benq ndeu, gyoengqde aj aen bak hung, gaemz hung gwn raemx ndaw naz, lumjdwg cungj ceng dwk vaiqvaiq majhung nei.

W, bineix itdingh youh dwg bi demsou ndeu!

(Gyanghsuh Nanzdungh Si Yuzdungh Yen Youjyiz Lu Siujyoz Cangh Hungzcouh)

Gij Bienqvaq Ranz Daxgoeng

爷爷家的巨变

Mwh gou sam seiq bi, ranz gou lij gig hoj: Seiq fungh ranzvax gaeuqgeq, aenhongh mbouj miz veizciengz, aenvih aen ranz gaeuq lai mbouj coih gvaq, mizseiz gyanghaemh youq ndaw ranz cungj yawj ndaej raen ndaundeiq; daxgoeng daxbuz daengx bi guhhong, bi ndeu roengzdaeuj, lij dwg gwn mbouj imq daenj mbouj raeuj.

Daengz seizhah, duznyungz ranz daxgoeng lai dangqmaz, lumj fatbag nei daeuj haeb gou, haeb ndaej ndang gou hwnj nwnj youh hung youh nding humzhanghang. Bungz daengz fwn doek, ranz rohyaegyaeg, ndaw ranz baij rim bat doengj daeuj ciep raemxfwn, cungj mbouj miz dieg byaij lo.

Sam bi gonq, gou riengz daxboh daxmeh daeuj ndaw singz, doeklaeng ranz daxgoeng hix bienq

lo: Bet fungh ranzvax hunghwd daj ndaw dieg soengz hwnj, duznyungz dwgcaengz hix deng laengz youq rog cuengsa, cien mong hix yungh cienmeng hau daeuj nem hwnjbae, youq aen ranz yienghneix youq cwxcaih lai lo.

Bi’ gvaq, ranz daxgoeng dem le haujlai doxgaiq: 55 conq densigih yawj cingcuj raixcaix, sijyihgih cienz swdung swiq buh ndaej seuqsaksak, gunghdiuz vih dou soengq daeuj rumz liengz…… Gij doxgaiq neix vih daihgya daiq daeuj fuengbienh, gwnz naj daxgoeng daxbuz cungj dwg riunyumnyum.

Daxmeh naeuz, gij bienqvaq neix cungj liz mbouj ndaej gij fazcanj hung guekcoj raeuz. Guekcoj, gou yaengx mehfwngz haenx mwngz!

(haj nienzgaep Huz Hanzhih)

